



MOHD. NOH DALIMIN (berkemeja putih) menyampaikan agihan daging korban kepada penduduk kampung di Kemboja, baru-baru ini.

Korban UTHM di Kemboja

Oleh MOHD. SAIFUL MOHD. SAHAK
kampus@utusan.com.my

HARI Raya Aidiladha atau Hari Raya Korban merupakan salah satu hari kebesaran yang disambut umat Islam di seluruh dunia.

Seluruh umat Islam merayakannya dengan membuat ibadah korban bagi memperingati peristiwa Nabi Ibrahim dan anaknya Nabi Ismail yang taat dalam memenuhi perintah Allah.

Mengambil saat pergorbanan itu, Universiti Tun Hussein Onn Malaysia (UTHM) menganjurkan ibadah korban buat pertama kali di luar negara iaitu di Kemboja baru-baru ini.

Menurut Naib Canselor (UTHM), Profesor Datuk Dr. Mohd. Noh Dalimin, ibadah korban yang diadakan di Kemboja merupakan satu manifestasi tanda keprihatinan warga akademik universiti, pensyarah, pentadbir, kakitangan sokongan dan pelajar sesama saudara Islam yang berada di Kemboja.

"Semangat ukhuwah Islamiyah warga UTHM dengan penduduk di Kampung Tenong, Kampung Ang Dong So dan Kampung Chroy Metrey yang begitu daif sejarah dengan konsep 1Malaysia.

"Kita merasakan sebagai rakyat Malaysia ia merupakan satu tanggungjawab sosial dan bertepatan dengan semangat persaudaraan sesama

Muslim walaupun jarak membezakan dua buah negara," katanya.

Program itu menghimpunkan kira-kira 500 penduduk kampung yang turut bersama menuaikan solat sunat Aidiladha, khutbah dan beroftong royong menuaikan ibadah korban.

Sebanyak 31 ekor lembu dikorbankan hasil sumbangan warga UTHM. Daging korban itu kemudian diagihkan kepada kira-kira 1,200 fakir miskin, ibu tunggal dan penduduk kampung yang kurang berkemampuan.

Program ibadah korban dengan kerjasama Pusat Islam UTHM itu disertai warga akademik dan pelajar bagi melihat dengan lebih dekat lagi serta merasa suasana ibadah korban yang dilaksanakan di negara itu.

Mohd. Noh berkata, program itu selaras dengan hasrat Kementerian Pengajian Tinggi agar setiap institusi pengajian tinggi di negara ini digalakkan menghulurkan bantuan yang sewajarnya dalam membantu pembangunan sosial terutamanya dalam bidang pendidikan di negara seperti Myanmar, Kemboja, Vietnam dan Laos.

"Kemboja merupakan negara bukan Islam yang terbuka dan penduduk Islamnya memerlukan bantuan untuk pembangunan pendidikan dan ekonomi.

"Selaras dengan hasrat itu, UTHM mengambil inisiatif membantu pelajar

dari Kemboja yang ingin melanjutkan pengajian di peringkat Ijazah Sarjana Muda di universiti ini," katanya.

Mohd. Noh menambah, usaha membantu masyarakat Islam di seluruh dunia termasuk di Kemboja tidak seharusnya terhenti walaupun jarak memisahkan antara dua buah negara.

"Sehingga kini, UTHM turut membantu negara-negara Islam lain dari segi latihan dan bimbingan, pendidikan serta sumbangan dalam memakmurkan Islam tercinta," katanya.

Dalam pada itu, sempena program ibadah korban yang diadakan Mohd. Noh juga berkesempatan menemui dan mengadakan perbincangan bersama Menteri Buruh dan Latihan Vokasional Kemboja, Othman Hassan.

Dalam pertemuan tersebut kedua-dua pihak bersetuju untuk memperhalusi cadangan kerjasama di antara UTHM dan Kemboja.



Sertai kami

facebook

Helo Kampus